



Ustarias serradas e vidas en il Grischun. La resposta da cusseglier guvernativ Marcus Caduff: «Da grond'importanza èn mesiras spertas per segirar la liquiditad da las interpresas.»

FOTO O. AEBLI-ITEM

# Mitigiar las consequenzas grevantas per l'economia grischuna

Il chantun Grischun ha installà ina «Task Force» per sustegnair l'economia en pitgiras

CUN MARCUS CADUFF  
HA DISCURRI MARTIN CABALZAR/FMR

■ Las disposiziuns statalas en connex cun la crisa dal corona han consequenzas zunt grevantas per l'economia. La Fundaziun Medias Rumanstschas ha discurre cun il minister d'economia grischun, cusseglier guvernativ Marcus Caduff.

*Tge signifitgeschan las mesiras decretadas dal Cussegl federal e sustegnidas da la Regenza grischuna per l'economia da noss chantun?*

**Marcus Caduff:** Las mesiras pridas tutgan cun tutta direzza las interpresas e la populaziun dal Grischun. Nus essan fitg preoccupads e fashain gronds quitads pertutgant las consequenzas economicas dal coronavirus. Las mesiras decretadas èn deplorablamain necessarias, era sch'ellas han sensibilas consequenzas tant per l'economia sco per la societad.

## Bunas premissas socialas e finanzialas

*Tge pussaivladads han chantun e Confederaziun per sustegnair l'economia en questa situaziun extraordinaria?*

La Svizra dispona da bunas premissas socialas e finanzialas per mitigiar la situaziun. Nus avain a disposiziun instruments cumprovads sco l'indemnisaziun per lavur curta, l'assicuranza da dischoccupads e l'agid social per persunas en pitgira. Quels instruments na vegnan dentant betg a tanscher per cumbatter las consequenzas economicas da questa crisa. Perquai ha la regenza installà gia il venderdi passà ina «Task Force Economia» che lavura intensivamain per realisar ulteriuras mesiras da sustegn per las interpresas e per ils lavurers ed emploiads pertutgads.



Marcus Caduff è preoccupà da las consequenzas grevantas da la crisa dal corona sin l'economia.

FOTO SOMEDIA

*La Confederaziun metta a disposiziun 10 milliardas per mitigiar las consequenzas economicas. N'è quai betg bler memia pauc, gea, in fav en in lai sch'ins considerescha che la Confederaziun ha gi mess a disposiziun a sia uras quasi sur notg 60 milliardas per salvar las bancas?*

La Confederaziun è conscienta che la summa gia decidida na vegn betg a tanscher. La Confederaziun ha mess en vista per ils proxims dis ulteriuras mesiras. I sa tracta da stgaffir e garantir la liquiditad da las interpresas pitschnas e mesaunas e d'extender l'indemnisaziun da lavur curta sin ulteriuras gruppas da persunas.

*Tgi sa insumma profiter da l'indemnisaziun da lavur curta?*

La finamira da l'indemnisaziun da lavur curta è da cumpensar las perditas che sa resultan d'in'interrupziun da la lavur u d'ina reducziun temporara dal temp da lavur stipulà en ils contracts da las interpresas pertutgadas. Durant in tschert temp vegn ina part dals custs dals salaris sustegnida per uschia pudair evitar visadas da piazza. Il dretg da retrair indemnizaziuns per lavur curta han tut ils lavurers ed emploiads che ston pajar contribuziuns a l'assicuranza da dischoccupads. Il Cussegl federal ha incumbensà il Seco d'examinar la pussaivladad d'ex-

tender la grappa da tals ch'han il dretg sin in'indemnisaziun era sin lavurers cun contracts da lavur limitads (betg visabels) e sin lavurers occupads mo temporarmain.

*Tge pussaivladads han chantun e Confederaziun da sustegnair cunzunt interpresas pitschnas e mesaunas che vegnan svelti en pitgiras pervi da la liquiditad sche las entradas mancan e las expensas restan?*

## Segirar la liquiditad da las interpresas grischunas

Da grond'importanza ed urgenza èn mesiras spertas per segirar la liquiditad da las interpresas. Il chantun è conscient che las interpresas pertutgadas dovràn uss ina liquiditad supplementara. Actualmain vegnan examinadas differents pussaivladads per savair porscher ensemen cun las bancas la pussaivladad da metter a disposiziun garantias da cauziun per uschia mantegnair la liquiditad. Nus stain en contact direct cun la Confederaziun per elavurar soluziuns cunvegnetas.

*Èn las pajas dals lavurers ed emploiads pia garantidas?*

Cun l'indemnisaziun da lavur curta e las ulteriuras mesiras vegn empruvà da surmuntar questa fasa difficila e tranter auter era cun segirar las pajas.

*Co statti dentant en quest regard per persunas cun engaschaments parzials u per stagiunaris?*

Questas gruppas da persunas vegnan resguardadas actualmain mo excepziunmain per in'indemnisaziun da lavur curta, per exempel tals che disponan da contracts da lavur temporarmain limitads. Chantun e Confederaziun examineschan actualmain cun gronda intensitad soluziuns per questas persunas.

*Co pon patruns e persunas cun lavur independenta e sur sasezzas vegnir indemnizadas u è quai simplamain il ristg da l'inteprendider?*

Era per questa grappa da persunas pertutgadas tschertgan chantun e Confederaziun soluziuns. La Confederaziun vegn ad infurmar ils proxims dis davart ils resultats.



*Ina rolla centrala gogan actualmain era las segiradas. Nus savain d'in ca concret nua ch'ina segirada ha snegà ad in'interpresa*

*in'indemnisaziun, malgrà che quella era segirada en cas d'epidemias, cun l'argumentaziun ch'i na sa tracti betg d'ina epidemia, mabain d'ina pandemia? È quai legitim e giuridicamain correct?*

## Tenuta dispitaivla da las segiradas

Davart il singul contract na pudain nus betg giuditgar. Nus avain dentant gia gi numerus resuns partegnent la tenuta da las assicuranzas. Jau vegn a deponer questa questiuon a la Confederaziun damai ch'il squitsch dal chantun persul na vegn betg a gidar.

*In auter partenari impurtant èn era las bancas. Èn quellas era prontas da porscher maun e da cooperar ed en tge furma?*

Nus essan en contact cun las bancas, cunzunt cun la Banca Chantunala Grischuna. A nus han ellas empermess da porscher maun per il sustegn necessari tar l'elavuraziun da soluziuns pussaivlas.

*Gist quests dis sa mussa ch'interpresas che disponan da bunas infrastrukturas digitalas e pon nizzegiar las pussaivladads dal «homeoffice» èn en*

*avantatg. Quinta il chantun uss anc intensivair l'offensiva digitala planisada dotada cun 40 milliuns sin fundament da questas experienzas?*

## Segiramain in nov stumpel per la digitalisaziun

Impurtant èsi ch'i dat ina buna infrastruktura per soluziuns digitalas. Qua essan nus sin la dretga via, sco quai che la situaziun actuala cumprova. La situaziun actuala vegn segiramain a dar in nov stumpel a la digitalisaziun.

*En Voss departament avais Vus stgaffi ina «Task Force». Co sa cumpona quella e tge incumbensas prioritarias ha ella?*

La pli gronda prioritad è actualmain d'elavurar mesiras per liquidar a moda speditiva las numerusas dumondas da lavur curta sco era d'examinar l'estensiun da l'indemnisaziun curta u l'introducziun da mesiras paregliablas per persunas cun contracts da lavur temporarmain limitads e per interpendiders independents. Plinavant sa tracti era d'elavurar mesiras sveltas ed effizientas per segirar la liquiditad da las interpresas.

*Co giuditgais Vus sco minister d'economia il privel che las restricziuns economicas pudessan la finala manar ad ina recessiun generala?*

En il mument na pon las consequenzas economicas da la crisa enturn il coronavirus anc betg vegnir validadas. Per las proximas emnas e per ils proxims mais quintel jau cun considerablas perditas economicas che vegnan a laschar enavos lur consequenzas. Per giuditgar las consequenzas a lunga vista èsi anc memia baud. Impurtant èsi dentant era che scadin interpendider fa sez ponderaziuns cun tge mesiras el po meglierar a curta vista la situaziun da sia interpresa.